



Орган Лемковского Союза.

Пренумерата в краю:
30 грошей місячно,
80 „ квартално
1'50 „ полрочно,
3 зл. рочно.
В Америкі: 1 дол. рочно.
В Чехословакии:
2 кор. місячно, 10 кор. полрочно,
20 кор. рочно.
Конто чекове Нр. 404.155.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателів, котри не вплатили ище пренумераты, просиме выровнати якнайскорше рахунки.

Также просиме присылати членскы вкладкы до Лемко-Союза.

Просиме присылати материал до календара на рок 1936.

По выборах до Сейма.

Дня 8. вересня отбыли ся выборы до Сейма. Повыходили новы послы, выбраны на основі новой выберательной ордынации. Медже выбранныма послами сут представителі всіх фахов и так: до сейма вошло 45 селян, 24 обшарников, 17 учителей середных и народных школ, 9 лікарей, 13 адвокатов, 3 нотаров, 6 инженеров, 17 урядников державных, 21 урядников самоуправных, 4 священников, 5 офицеров, 12 промышленников, 6 купцов, 6 ремесельников, 8 журналистов, 8 урядников приватных и 2 женщины.

Послы будучого Сейма не будут ділити ся так, як дотепер, на клюбы, але маот они потворити региональны группы послов, зложены с людей с одной закутины.

Группы тоты будут покрывати ся приблизительно с границами воеводств и каждая региональна группа, знаючи докладно свой терен и его потребности, мае приготовить плян работ, які належит перевести на даном терені, а также мае она обовязок познакомити ширший загал о условиях житя даной закутины державы.

При таком розложеною работы будучого Сейма можна надіяти ся, же дотеперешна, часто шаблонна работа, уступит місце работі плянковой, практично приміненой до потреб и житя людей. Счезне шаблон, а на его місце появят ся законы, узглядняючи экономичны условия ріжных регионов.

До того часу н. пр. при вызначаню податков не брано под увагу теренов низинных и горских, багнистых и сухых, глиняных и псковых, хоц выдальность грунту на ріжных теренах ест ріжна, а лем всі грунты в цілой державі поділено на клясы и от грунту той самой клясы назначано такой сам податок, хоц каждый знае, же той само клясы грунт черноземный, дае значно векши доходы, як грунт горский.

При узглядненю регионов такой поділ не може мати місце и податкы мусят быти вызначаны на основі доходов, які мае ся с грунту.

Инши сут способы господаркы на долах, а инши в горах. На долах фундаментом господаркы явят ся продукция хліба, цукровых бураков, бандуркы и т. п. Крім того ест то терен, надающий ся на купецкы сады, и до закладаня великих рыбных ставов. Тож послы такого региона приготуют плян будовы великих кооперативных млинов, горілень, цукроварень, броваров, сушарень овочей и т. д. и тым способом будут старати ся дати населеню возможность переробкы суровых продуктов рольных на промыслы и поднести их ціну.

В горах будова млина, бровару або цукроварні не принесе жадной користи, лем втрату, але зато в горах мае населене добры луку и пасовиска, мае коровкы и овечкы, мае прекрасны горы и лісы, рвучи потокуы и здоровый, живичный воздух. До тых горских богатств мусит примінити ся способы господаркы и послы горских теренов мусят старати ся о закладане кооперативных молочарень и сыроварень, о развитие деревяного промысла, о регуляцию горских потоков, будову дорог и т. д. штобы людям дати возможность збыта их рольных продуктов, а также притягнути в тоты горы літников и туристов.

Поступаючи так, послы всіх регионов дадут загалый образ потреб населеня цілой державы и если хоц часть тых потреб буде заспокоена, можеме быти певны, же экономичне наше положене поправит ся.

Товариство одной бандуры.

Одынока руска бурса на Лемковщині містит ся в Горлицах и ест властительом красного маетка, зложеного с мурованого, одноповерхного дома и трохморгового огорода. Число воспытанников бурсы увеличат ся с каждым роком, што належит приписатьи энергичному управленю бурсы. Особенно дотеперешны надзерателі и воспытателі бурсы г. г. Володимір Кордасевич и Максимович не жаловали николи труда для учащей ся молодежи, помагали ей в науці и посвячали для ей добра свои знаня и час. Тота щира опека, яку дарили они воспытанникам бурсы, давала все добры результаты и внушала уродичей довіре до бурсы и ей правления.

Тепер однак грозит нам велика опасность. Як довідуеме ся, власти школьны перенесли одного управителя бурсы (г-на проф. Вол. Кордасевича) до Олькуша, а другому (г-ну проф. Максимовичу) также до того часу не дали приділа при гимназии в Горлицах, што може стати ся причиною, же и он выйде с Горлиц и бурса лишит ся без вымаганого школьными властями фахового присмотра.

Таке позбавлене бурсы фахового руководителя и надзерателя може стати ся причиною закрытя бурсы, до чого мы жадном міром допустити не можеме. Не можеме лишити без опеки тых 32 молодых школяриков, котрых родичи отдали до бурсы, штобы они там набрали ума-розума.

Передовсем апелюеме до г-на Куратора в ділі приділа до гимназии в Горлицах проф. Максимовича и віриме, же г-н Куратор для добра нашей бурсацкой молодежи не откаже нам в том ділі.

Поza тым можеме надіяти ся лем на власны силы. Слава Богу, текучий рок принес нам красны вроды и где лем не знищил град, люды не можут ся скаржити.



Ест, як повідають, што істи, тай на боже дати. Гож дайме всі на тото „боже“ не много, але всі.

Не зробит то нікому ущерб, дати денно одну бандуру. Не дуже, лем одну бандуру, або часом, для отміны дакотрого дня одну головку капусти, або одно яблуко, одну жменю зерна, одно яйце и т. д. не веце, лем дашто одно, але день в день через цілий рок.

Скрепчеме бандуры и лишаме одну, не вариме и не іме ей, — даєме на бурсу. Мелеме зерно на хліб и также оставляме одну жменю зерна — на бурсу. Таксамо робиме при чищеню капусти, при збераню овочей, при рубаню дров и т. д. Всьо — по одной штуці—на бурсу.

Правда, через таку малу ошадность нікто не зголодніє, ани не збідніє, а коли то зробят всі села Лемковщины, буде того так дуже, же напевно наши школяриky в бурсі не зазнают голода и холода и буде чим оплатити фахового надзерателя.

Тож організуєме всяди при читальнях и кооператывах

товариства одной бандуры (грулі)

с перезначенєм той бандуры на бурсу в Горлицах. Помоч така єст доконче потрібна, бо, як нам відомо, бурса приймаєт воспытанников по барз низкой ціні (дакотрых по 7 и 8 злотых місячно) и без помочи загала не зможе их выкормити без задолженя. Я в нашом селі уж бесідовав с сусідами и всі без выключеня прирекли основати

Т-во одной бандуры.

Гриц с горбка.




Передовы господарства.

Живыи примір потрафит все скорше переконати, як слова. С книжок, с описов знаме нпр., же сут великы міста, як Лондон, Нью-Йорк и Парыж, але аж личный побыт в тых містах дає нам правдивый образ тых міст. Знаме, же заграницом селяне господаруют лучше от нас, але аж нпр. участь в прогулці переконує нас о том и выказує, чом то там господарка приносить вышии доходы, як у нас. Многым річам человек вірит аж втотчас, як увидит власныма очами. Тому то по инициатыві Министерства Рольництва и Реформ Рольных организує ся по селах т. зв. „передовы господарства“. Операт ся тото на том, же в даком селі оден або веце господарей, котры розуміют потребу приміненя новіших способов господарованя, одержуют указаня и всяку помоч в цілі поднесеня господарства. Порады и указаня относят ся не до одной sprawy, але до цілости господарки, аджек не лем — дайме нато — годовлі живины, але и механичной обробки нивы, устройства оборы, забудовань, мешканя и т. д. Жадна сторона господарства и житя газды не може быти поминена.

Ціль такого пөведеня и даваных рад єст поднести не оден поодынокый варстат рольный. Невелика была бы користь, як бы лем одно господарство стояло высоко и приносило доходы, а решта была зацофана. Ту ходит о поднесенє культуры в цілой масі малых варстатов. Выбране господарство має быти лем образцом, як треба господарити.

Не подлежит сомнію, же за одним господарством пойдут инши, передом одно, пак друге и третє, а наконец ціле село. Так адже вокруг одного господарства повстає група, пак килька груп, добраных так, штобы находили ся приблизительно в одинаковых условиях што до самого грунту, количества живины и т. д. Видиме с того, же господарство передове, дійствующи живым приміром, потягне за собом инши, котры приміняють лучши способы господарованя, — достають лучши результаты. С того видиме, як велике значенє може проявити в житю села передове господарство и єго властитель, ци управитель. Але не конец на том. Як камень, шмареный до воды, творит на ней кругы, котры расходят ся дальше и дальше, так само живыи примір передового господарства обнимат не лем группы, але счасом ціле село, а нераз перешмарят ся и на села сусідны. И именно тота єст ціль твореня таких образцовых господарств и груп.

Управитель господарства, або группы має уділяти всяких порад и указань своим сусідам, має провадити рахунки, бо тото найлучше переконує каждого о потребі поступа. Тым путем идучи, можеме быти певны, же поволы всі господарства станут ся передовыма, завдякы чому поднесе ся культура и добробыт села. Тож, кто чує ся на силах и має охоту трудити ся на народной ниві, нехай творит передовы господарства и группы. От того єст зависима будучность наших господарств сельских.



Розрухы на Литві.

Уж в попередном числі доносили мы о кырвавых розрухах на Литві и о выданю правительством ряда незвычайных заряджень.

Помимо акции войска и полиции, розрухы хлопскы тревают дальше. Селяне, котрым надоіла уж біда, не хотят вывозити своих продуктов до міст и жадають, штобы правительство заняло ся голодом и нуждом села и штобы предпріяло охороняючи міры и окружило селян опеком.

Послідством тых розрухов было уступленє двох министров: внутренних діл и рольництва.



Комисии для клясыфикации грунтов

начали уж работы.

В Дневнику Законов Р. П. Нр. 67. было оголошене зарядженє министра Финансов с дня 29. серпня т. р. о терміні зачатя работ комисии клясыфикацийных.

Работы тоты начали ся дня 1. вересня т. р. в Головной Комисии Клясыфикацийной при Министерстві Финансов в Варшаві и в воеводских комисиях клясыфикацийных.

Клясыфикация грунтов єст пекучом справом, бо послідна клясыфикация была переведена перед парудесятома роками, а через тот час господарчи условия змінили ся не до познаня. Переведенє клясыфикации грунтов усуне также бракы в вымірах грунтового податку.



В Женеві старають ся не допустить до войны.

В Женеві начали ся обрады. собраня Лигы Народов, в котрых берут участь министры заграничных діл многих держав.

Рада Лигы Народов занимала ся на вступі конфликтом италиянско-абисынским. Ест то справа барз трудна. С одной стороны Италия не хоче в ничом уступити и ставят твердо свои жаданя, а с другой зас Абисыния апелює до Лигы, штобы взяти под увагу ей тяжке положенє и не допустить до нанесеня ей выразной кривды.

На одном с засідань переговорили ся остро медже собом делегации италиянска и абисынска. Был момент, же Италияны, подражнены острым тоном делегата Абисынии, опустили салю нарад.

Наконец посчастлило ся якоси всьо змягчити и выбрано комитет, зложеный с делегатов 5-тох держав, котрый має обдумати способ уладженя конфликта италиянско-абисынского. До комитета входят делегаты Англии, Франции, Польши, Турции и Испании. Комитет взял ся уж до работы, але ци посчастит ся им помирити противников, покаже будучность.



Замах в Амерыці.

В столиці державы Луисияна в Амерыці напал на б. губернатора той державы, сенатора Лонга дня 8. вересня лікар Вейсс и ранил єго двократным выстрілом с револьвера. Зараз по выстрілах начали стріляти товаришучи сенаторови тайнякы и засыпали напастника стрілами так, же упал мертвыи на землю. Лонга перевезено до шпиталя, где отдано єго операции. Вынято кулі, але помимо безотложной помочи лікарской Лонг умер в пару дней по операции.

Лонг тішил ся величезном популярностью серед жителей своєй провинции и всіх сполученых держав. Был он крайным радыкалом и рішительным противником президента Рузвелта. Был он поважным конкурентом Рузвелта в часі найближих выборов на президента Сполученых Держав.

В провинции Луисияна сен. Лонг мал власть диктаторску, хоц не был в послідных часах ей губернатором.

Вейсс убил Лонга на приказ заговора, о котром Лонг знал, але не брал єго поважно.



АМОРТИЗАЦИЯ СКАРБОВЫХ ПОЖИЧОК НА БУДОВУ ШКОЛ.

В найближих днях появит ся зарядженє министра финансов о амортизации пожичок на будову народных школ, уділеных через Скарб Державы перед 1. квітня 1934 р. громадам сельским непосредно, або посредством повітовых самоуправных урядов.

Амортизация всяких належностей и претенсий Державы с того тытула буде примінена до громад и тых рад самоуправных, котры зятягнуу для себе пожичку спотребовали на будову народных школ сельских.

Загальна сума таких пожичок выносит около 9. миллионов злотых.



ЯК ХОВАТИ КУРЫ, ЖЕБЫ СЯ ДОБРЕ НЕСЛИ.

Кура вартат вене, если часто несе яйца. Але як корова при скупом кормленю не даст молока, так само и кура, як не доста не того, што потребує ей организм, не може выпрокувати дуже яйц. Не можна числити на того, же кура найде собі всьо, што потребує. Видиме того на годовлях кур заграничных, где кура зносит рочно 200 и вене яйц, а у нас ледво 50 до 60 и то лем в літі, коли яйца сут найдешевши. Тепер, в осени, молоды куркы повинни ся уж нести. Если так не єст, то лем прото, же сут кормлены скупо, и хозяйка о них не дбат. Тымчасом яйца в осени и в зимі сут найдорозши и тому вартат посвятити той справі кус увагы.

Корм куры має складати ся с двох частей: одна часть єст Perezначена на удержане куры при житю, друга — на продукцию яйц. Численны досліды доказуют, же пересічна кура, котра важит 2—3 кг., потребує для себе найменше 8 граммов білка, котре треба ей давати в кормі. Аж того, што єст понад тоту норму, иде на продукцию яйц.

Для утвореня яйца кура мусит мати два складники: білко и вапно. Кура, котра ся не несе, выдала вапно разом с отходами, але несуча ся кура спотребує вапно на будову шарлуп.

Понеже шарлупа важит около 5 граммов, прото кура мусит достати в кормі каждого дня 5 граммов вапна. Если вапна даме менше, то шарлупа буде мягка и тонка, котра толче ся скоро.

Для продукции одного яйца потреба курі 15 гр. білка. В виду того кура для удержаня свого житя и утвореня одного яйца мусит достати денно што найменше 23 гр. білка и 5 гр. вапна. Если достає менше, то, понятно, нести ся не може. Єст то зрозуміле, бо с порожного и кура не наліє. Як же в виду того кормити куры, штобы они несли яйца?

Найчастійше кормиме куры вареныма бандурами. Але 1 кл. бандуры містит в собі всього 10 гр. білка и 0.3 гр. вапна. Для потребного количества білка, мусіла бы кура счисти 2 1/2 кг. бандуркы, а для потребного ей вапна аж 15 кг. Річ проста, же кура не може помістити в своем малом жолудку так дуже корма, и зрештом, такый корм был бы дорогой. Тож мусиме давати курам корм сытний, котрый містит в собі білко и вапно. Кура може прийати денно 100 гр. корма. На тот корм можна ей дати 65—70 гр. бандуркы, а 30 до 35 гр. мусит припадати на корм, богатый в білко и вапно. Таким кормом сут: горох (в 1 кг. єст 179 гр. білка) ячмень — 60 гр. білка, мясна мучка — 557 гр., мучка с кырви — 714 гр., пшеничны отрубы — 91 гр., сухе молоко, (без толща и воды) — 296 гр. и т. д. Знаючи склад паш, які має ся на господарстві, каждый може уложити собі способ кормленя кур так, штобы они добре розвивали ся и несли ся.

Треба зазначити, же на вытворене яйца кура потребує 12 дней. Тож треба мати терпеливость, бо кура зараз на другый день по одержаню паши яйца не знесе. Але добре кормлена кура може нести ся праві каждого дня.

ЯК ПЕРЕХОВУЄ СЯ МАСЛО.

Свіже масло виробити в чистой воді, зміняючи часто воду, так долго, аж вода буде совсем чиста.

Выполokane так масло посолити чистом білом сольом с додатком салитры (на 1 кг. масла дає ся окописту ложку соли и 1/2 дкг. салитры (и добре вымішати. Выроблене и посолене масло укладати до каменного горнца, або деревяной діжечкы, старанно выпареной и вымытой. Укладаючи, убивати деревяным валком, штобы масло было добре убите.

Так уложене по верх посуды масло прикрити чистом шматком и посыпати сольом. Держати в зимном и сухом місци. Перед ужитєм выполокати в зимной воді, змішаной с солодкым молоком.



ПОВИЛА СО СЛИВОК.

Сливкы, венгеркы, выполоканы водом и очищены с косток перемолоти на машинці до мяса. Так приготовлены зложити до широкого горнца або рондля, поставити на огні и смажити, мішаючи деревяном лопатком, штобы ся не припалили.

Як уж згустнут, додати цукру в пропорции 1 кг. на 10 кг. сливок, вымішати и смажити дальше аж до полного згустнення. Можна также вымішаны с цукром вставити до горячого пеца хлібного и оставити так долго, покля не згустнут. Ставляючи сливкы до пеца, треба под посуду подложити рушт, або бляху, штобы ся не припалили. Повила втотчас сут добре высмажены, коли не падают с ложки грудками, а положены на тарель, не розливают ся.

Выварены повила накладати до каменных горнят и вставити до теплого пеца. Як зверха застынут, выняти, остудити и обявзати восковым папером.



ТЕРМИН ДО ВНОШЕНЯ ПОДАНЬ О ПРИ- НЯТЄ ДО ДУХОВНОЙ СЕМИНАРИИ.

Гимназийны матуристы Лемковщины, котры намірают посвятити ся духовному станови, мают внести до Ордынарията Апостольской Администрации прошенє о прийнятє на Богословє и до духовной семинарии до дня 25. вересня т. р.

До прошеня треба приложити:

- 1) ментрыку крещеня и миропомазана
- 2) свідоцтво зрілости в орыгиналі и всі гимназийны свідоцтва
- 3) власноручно написаный опис власного житя (curriculum vitae).
- 4) декларацию родичей што до оплат на университеті и в духовной семинарии.
- 5) почтовы значкы на 1. зл. на кошты пересылкы.

Прошеня належит вносити посредством своего пароха котрый до прошеня долучит от себе в закрытой коперті квалификацию петента и свое внесене што до прийнятя. Звертат ся увагу, што добра нота с грекы и со співу єст потребна.


До елекции належит явити ся лично дня 28. вересня 1935. о годині 15-той в тутешной Курии в Рыманові-Здрою.

„Діло“ о выборах.

Украинска газета „Діло“ в Ч. 239. с 8. вересня помішат артыкул „В преддень выборов“, в котром медже иншим пише, же населенє украинске не має причин до невдоволеня, бо безпорным и вел кым сукцесом явят ся факт заламаня ся „концепций региональных“ на терені Галичины, в особенноти факт трактованя Лемковщины, яко неподільной части га-лицко-украинской территории этнографической. „Діло“ пише дальше, же до безпорных успіхов належит зачислити также выелиминованє „москофілів“ яко чинник політичный, через што „москофілі“ утратили дотеперешны свои мандаты, використованы все до вічної противукраинской работы.

Переходячи погодивше до самого дня выборов, „Діло“ пише, же масова участь украинскых выберателей в выборах даст украинским послам конечну базу моральну, силу и авторытет смілого и достаточного высуваня постулятов украинскых и возможность розвита на украинскых землях в Польщі Пиемонта всеукраинского.

„Діло“ тішит ся кус за скоро своима сукцесами, бо именно дня 8 вересня тота „масова участь украинскых выберателей“ выказала ясно, же украинцы не мают на Лемковщині нич до гляданя. Може и заламала ся сама „концепция региональна“, але не заламал ся русский лемко, котрый при выборах сказал украинскому кандыдату, помещеному на другом місци в окрузі Сянок, Коросно, Лєско, же Лемковщина єст руска и таком остане. Тот факт проваленя украинского кандыдата нашима голесами єст наилучшим доказом, же на Лемковщині ніт украинскых выберателей и повинен быти для украинцов пересторогом, штобы не пхали носа до чужого проса.



О С Е Н Ь.

Находит уж осень,
А за ньом зимонька,
Сонце гріє слабо,
Ніт уже тепленька.

Все лем вітры віют
По горах, кычерах,
Штодень инша хчыла
Зимнійша, як вчера.

Смутно лісы шумят,
Пташкы не співають,
Лем малы вороблі
Под дах ся ховают.

Масек.



ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“

Што чути в світі.

В Шанхаю (Кытай) напало 4-ох бандытов на транспорт золота вартости 100.000 долларов. Транспорт тот перевозил урядник почтовый с одним кытайским кулисом и двома вооруженыма сторожами. В стріляніні згинул кулис, а оба сторожи отнесли раны. Бандыты утекли с золотом в ждучом на них автомобилі. Напад тот выкликал в цілом місті великий переполох, бо єст то найсмільший напад бандыцкый сорганізований в посіддних літах.

В Швайцарии заряджено плебисцыт в ділі цілковитой ревизии швайцарской констытуции, ухваленой ище в р. 1848. В часі голосованя высказало ся за ревизиом 193.293 против 509.129 голосов.

Совітска молодеж домагат ся реформы сопружих переписов в С. С. С. Р., бо теперешный стан має много до желаня. Совіты потребуот сильных родин, а дотеперешны права не обезпечают перед покиданєм дітей, што вытворює великы масы „безпризорных”.

Лизбона, дня 10/IX. в годинах ранних выкликано против правительству повстанє, котре однак правительство здавило. Офицер марынаркы Миндас Ортон старал ся нагварити залогу воєнного корабля „Бартолоне Диас” до явного бунта, але капитан корабля арестовал єго.

Прейсвальд (Німеччина) 10.IX. в пятиповерхном сыпанці долготы 60 метров, ширины 25 метров повстал пожар с невыслідженой причины, котрый знищил 50 тысяч сотнаров зерна.

Льондон 11.IX. Англицка газета подає заявленє одной выдаючой ся грецкой личности, же поворот короля Юрия до Греции наступит в другом або третом тыждні листопада.

В Женеві „Комитет Пятох” предложил проєкт, выроблений віроятно Лявальом (Министер заграничных діл Франции), же в Абисынии має быти утворена медженародна полиция, зложена с 10 тысячей французов и англичков и 15 тысячей италиянов под начальством италиянским. Полиция ма-ла бы ціль удержати лад и порядок в Абисынии и обезпечити италиянскы колонии.

Мексык 12.IX. В парламенті в часі острой дискуссии оден посол добыл револьвер и начал стріляти. В салі повстал дикый тумулт и вывязала ся загальна стрілянина. Два послы отнесли тяжкы раны, а одного убито.

Коло Тулы (Совіты) в часі ночных вправ войсковых оден самолет помылил сыгналы и шмарил 5 тонн бомб на хемичну фабрику, котра вылетіла в воздух. Катастрофа потянула за собом численны жертвы.

С Рима доносят, же намірена загальна мобилизация фашистов вынесе 10 миллионов людей.

Италия перестеригат тепер всіх заграничных офицеров и вояков, же каждый европеєц,

котрого войска италиянскы хватят в часі воєнных операции в Абисынии, воюющих в рядах армии абисынской против Италии буде зараз розстріляный без суда.

Англия сконцентрировала в Египті 320 самолетов войсковых и укріпила гарнизон на острові Мальті (Середземне Море) о 3 батальоны піхоты.

В місті Нагата (Япония) выбухнул пожар, котрый знищил головну улицу торговельну міста. Жертвом поломени пало загалом 1100 будынков. 50 люда было попареных.

Вісти с краю.

В селі Смеречне пов. короснянсково на луках натрафили на нафтову ропу.

В Рымановской Завадці театральный кружок при чит. им. М. Качковского дає дня 21. вересня представленє и забаву с танцами.

В Зындранові пов. короснянского привалил хлопа в лісі зрубаний бук и потолк єго так сильно, же боре ся со смертьом.

В селі Черемсі пов. сяноцкого убито господаря Щєбрика и скрадено єму 200 долларов в часі, коли он возом вертал с весіля. Убийцу, котрого выявила власна жена, осаджено в вязниці.

Через село Волю Суровичну будує Фонд Труда нову, барз красну дорогу. Дорога буде сыпана дальше через Зындранову аж до Барвинка.

В ночи на 8.IX. сємох бандытов напало на жителей села Глиник Горишный коло Фрыштака. Бандыты по стерорызованю жителей села, обрабовали 7 господарей и утекли со зрабованым добром.

Польске Т-ство Турыстычне сорганізовало в том року по раз перший „Свято збераня винограда” в Заліщиках, в часі от 14-го до 27. т. м. Протекторат обнял министр ролництва Понятовский, б. министр Прыстор, министр М. Зындрам Косцялковский и министр ген. Каспржицкий. Участники користають со знижки жель-дорож. 33% в до-розі до Заліщик, а назад ідут безплатно.

Ровно: Власти безопасности арестовали 4 жидов, котры занимали ся нелегальным переселенєм через зелену границу С. С. С. Р. Хоплено их на границі коло Сапотына в моменті, коли старали ся перепровадити партию людей до Росии. Всіх осаджено в вязниці.

До Варшавы спроваджено 2 новы самолеты. Сут то найбільши самолеты в Польщі. Будут літати на штрєці Варшава-Гдыня и перевозити пасажеров. Скорость самолета выносит около 400 км. на годину. Самолеты цілы сут зроблены с металя.

Пат доносит: Загалом в цілой Державі управнєных до голосованя до Сейма было 16.282.575 особ. Участь в голосованю приняло 7.575.681. граждан. Пересічна фреквенция голосующих выносит 16.5%.

Воєводский комитет помочи потерпівшим от зливы отписал всі позичкы, уділены пошкодованым от зливы на купно живины. Таким способом должники сут освободжены от отдаваня позичєных сум, што єст для них великом льготом.

Слідство в ділі убийства 14 літної дівчины Герас нашло окрутну розвязку. Дівчину Герас убила в звірскый способ єй подруга 15-літна Мария Чак, котра в часі забавы в т. зв. „темну бабку” зяшмарила єй из за плечей шнурку на шию и затягнувши сильно, удусила ю. Чак убила ю прото, же Герас хотіла донести єй родичам, же она провадит ся неморально.

В горах на Гуцульщині упал сніг. Наступило сильне остудженє.

На станциях в Варшаві и Гдыні запроваджено джур с женщин, котрый має на ціли борбу с гандлярами живым товаром.

В мисионарской обителі пр. Йова Почаєвского во Владымірові на Карпатской Руси можна замовити посвячены на св. мощах Великомученника Панталеймона

Натільны образы

с Єго изображенєм, артыстычной работы, розмір 2 см.

Ціна одного образка с пересылком:
1) с білого металя под серебро 1.26 зл.
2) с чистого серебра . . . 2.50 „

При замовленю треба одночасно пересылати гроши на наше конто в Варшаві Нр. 190.239.

Адрес: Игумен Серафин Р. А. Lodomirova
U Svidniku Tchechoslovaquie.

ПРОДАМ СЕЙЧАС

пасіку
зложеноу з 15 улей
ПО НИЗКИХ ЦІНАХ.

ИНФОРМАЦИИ

В РЕДАКЦИИ ЛЕМКА
В КРЫНИЦІ.

КТО ХОЧЕ ЗАБЕЗПЕЧИТИ СЯ НА СТАРОСТЬ, АБО ЗЛОЖИТИ ДІТЯМ
ПРИДАНЕ НАЙ

заасекурує ся
в АСЕК. ТОВАРИСТВІ

Вита и Краковске
во ЛЬВОВІ